



Pelajar dari Pantai Timur tak balik bercuti, sertai aktiviti sukarelawan

Oleh Muhamad Lokman Khairi - Disember 24, 2022 @ 5:23pm
bhnews@bh.com.my



Pelajar Diploma Teknologi Reka Bentuk Dalaman UiTM Seri Iskandar membantu kanak-kanak asnaf memilih baju sekolah. - Foto MUHAMAD LOKMAN KHAIRI.

SERI ISKANDAR: Pelajar Diploma Teknologi Reka Bentuk Dalaman Universiti Teknologi Mara (UiTM) Kampus Seri Iskandar di sini, memanfaatkan cuti seminggu sambutan Krismas dengan sertai sukarelawan selepas tidak dapat pulang ke kampung di Pantai Timur akibat banjir.

Pelajar Semester Tiga, Nur Samihah Pauzi, 19, dari Pasir Puteh, Kelantan, mengambil keputusan tidak pulang kerana jalan raya yang menghubungkan rumahnya di Kampung Selinsing sudah ditenggelami air banjir dan mengakibatkan bas tidak dapat lalu.

Beliau diberitahu oleh keluarganya bahawa air banjir di rumah mereka setinggi paras pinggang.

"Mengenai aktiviti sukarelawan hari ini, saya dan rakan-rakan membantu adik-adik asnaf ini memilih pakaian persekolahan baru.

"Rata-rata mereka murid sekolah rendah segan untuk bercakap dengan pekerja kedai bagi bertanya mengenai saiz dan sebagainya.

"Maka, kehadiran kami selaku sukarelawan Salam Relief hari ini adalah sebagai pemudah cara untuk adik-adik ini dapat memilih pakaian yang mereka mahu," katanya ketika ditemui di Gedung Pakaian Hari-Hari Seri Iskandar, di sini, hari ini.

Pelajar Semesta Satu jurusan yang sama, Muhammad Amal Fairuz Anuar, 18, dari Setiu, Terengganu, berkata, dia mengambil keputusan untuk tidak pulang ke rumahnya di Bandar Permaisuri selepas keluarganya memaklumkan kawasan rumah mereka ditenggelami air banjir sehingga paras pinggang.

"Pada awalnya memang saya bercadang mahu balik kampung sempena cuti seminggu, tapi terpaksa batalkan sebab banjir.

"Jadinya, saya turut serta sebagai sukarelawan hari ini atas pelawan pensyarah," katanya.

Sementara itu, pensyarah Reka Bentuk Dalaman UiTM Kampus Seri Iskandar, Dr Norashikin Abdul Karim berkata, ini adalah peluang keemasan buat pelajarnya mendapatkan pengalaman melalui pendedahan aktiviti kesukarelawanan.

"Nampak seperti biasa-biasa sahaja, tapi inilah peluang untuk pelajar membina keberanian untuk berinteraksi dengan masyarakat dan memupuk sifat prihatin dalam diri mereka.

"Saya gembira kerana pelajar-pelajar ini terus ambil keputusan untuk ikut serta apabila dipelawa," katanya.

Nur Samihah dan Muhammad Amal adalah antara tujuh penuntut Diploma Teknologi Reka Bentuk Dalaman, UiTM Kampus Seri Iskandar yang menjadi sukarelawan Salam Relief hari ini.

Seramai 55 kanak-kanak asnaf dari daerah Perak Tengah diraikan oleh badan bukan kerajaan (NGO) Salam Relief dengan pembelian pakaian dan kelengkapan persekolahan di Gedung Pakaian Hari-Hari Seri Iskandar.